

Ilulissani ukiuunerani imeqarfiup killeqarfiani, UNESCO-p nunarsuarmiunut kingornussarititaani aamma UNESCO-qarfiup killeqarfiani tassunga atasumi qamutit assakaasullit atorlugit angallanneq pillugu nalunaarut

Avatangiisinik innarlitsaaliuineq pillugu inatsisartut inatsisaanni nr. 9-mi, 22. novembari 2011-meersumi, kingusinnerusukkut Inatsisartut inatsisaatigut nr. 16-ikkut, 1. decembari 2021-meersukkut allannguuteqartinneqartumi § 10, imm. 1, nr. 6, 20 aamma 27, § 11, § 28, imm. 3, § 34, nr. 1 aamma 2, § 56, imm. 1, aamma § 66, imm. 3, aammalu pinngortitamik illersuineq pillugu Inatsisartut inatsisaanni nr. 29-mi, 18. decembari 2003-mi § 39, imm. 5, § 46, imm. 1 aamma 2 aamma § 60, imm. 2 naapertorlugit aalajangersarneqarput:

Atuuffa

§ 1. Nalunaarut manna Ilulissani imeqarfiup killeqarfiani aammalu UNESCO-p nunarsuarmiunut kingornussarititaata ilaanni killeqarfinnilu tassungalu atasuni, ilanngussaq 1-imi takuneqarsinnaasumi, ukiukkut ingerlaarnermut atuutsinneqarpoq.

Qamuteralaat illiniliuutillu atorlugit angallanneq

§ 2. Kommunalbestyrelsip tamanut nalunaaruteqarnerani angallavittut illiniliat 4 meterinik silissusillit, ilanngussaq 1-imi takuneqarsinnaasut iluanni qamuteralaat illiniliuutillu atorlugit angalasoqarsinnaavoq.

Imm. 2. Imm. 1 naapertorlugu nalunaaruteqartoqassappat, piumasaqaatit uku naammassineqarsimassapput:

- 1) Nunap qaava qerisimasoq, apummik qallerneqarsimasoq, aammalu naasunik nunallu qaavanik akornusiisoqarsinnaajunnaarlugu angalasoqarsinnaasooq kommunalbestyrelsimit uppersarneqarpat.
- 2) Kommunalbestyrelsip illernit angallavissat piareersarsimappagit, aammalu ersarissumik nalunaaqutsersorsimappagit.
- 3) Angallannermi kuuit, imeqarfinnik pilersuisuusut ikaarlugit angallattoqalinnginnerani qerisimasut kommunalbestyrelsimit uppersarneqarpat.

Imm. 2. Angallannermut illiniliamut tungujortoq qaamasumut, Ilulissat kangiani qaqqap innartaata ataa sinerlugu illiniliaasumut, taarsiullugu angallannermut illiniliap tunguusap, Ilulissat kujammut kangiani

qoorukkoortup sapinngisamik ator neqarnissaa qulakkeerniarlugu kommunalbestyrelsi naammaginartumik iliuuseqassaaq.

§ 3. Angallannermut illiniliat pisareersarneqarnerini nalunaaqutsersorneqarnerinilu suliaasat, illiniliornermi pisariaqartinneqartuniittut kisimik suliarineqassapput.

Imm. 2. Ajutoornissaaq pinaveersaartinniarlugu kommunalbestyrelsi angallannermut illiniliani illiniliuutit atorlugit ingerlaavartumik manissaasassaaq.

§ 4. Angallannermut illiniliani ilanngussami takuneqarsinnaasuni angallannerit taamaallaat akuerineqarsinnaapput, piumasaqaatit uku malinneqarpata:

- 1) Qamutit assakaasullit nakkutigineqaratik qimanneqassanngillat.
- 2) Angallannermi naasut ajoquserneqarsinnaassanngillat, tassungalu ilanngullugu sakkortuumik sangunerit, sukkassarnerit uneriaatarnerrillu pinaveersarneqassapput.
- 3) Uuliamik tunisassiat akuutissallu allat mingutsitsinissamut ulorianaatillit uninngatinneqassanngillat.
- 4) Eqqakkanik qanorluunniit ittunik qimatsisoqassanngilaq.
- 5) Akuutissanik avatangiisinut ajoqusiinnaasunik assartuussisoqassanngilaq, tassanili ikummatissanik angalanermut atugassanik assartuussinerit pineqanngillat.
- 6) Qamuteralaat illiniliuutillu mingutsitsisinaanerup sapinngisamik killilerlugit ilusiligaassapput aserfallatsaalineqassallutillu.
- 7) Hydraulikuuliamik pinngortitami arrorsinnaasumik atuisoqassaaq.

§ 5. Kommunalborgstyrelsi angallattoqarsinnaanersoq pillugu tamanut paasissutissiinissamut pisussaapput.

Imm. 2. Kommunalborgstyrelsi angallannermut, nalunaarummi matumani pineqartumut sukumiisunik piumasaqaateqarsinnaapput, taassumalu ataani angallanneq assartuussinerimi siunertanut aalajangersimasunut killilersinnaallugu.

Imm. 3. Kommunalborgstyrelsi tamanut naammaginartunik ilitersuissaaq, tassungalu angallannermut illiniliat ator neqarnissaat, mingutsitsinernik nalunaaruteqartarnissaaq aammalu mingutsitsisoqartillugu isumaginninnissamut kommunalborgstyrelsip upalungaarsimanera pillugit paasissutissiinissat ilaatinneqarput.

Nakkutilliineq misissugassanillu tiguisarneq

§ 6. Kommunalborgstyrelsi angallannernik, nalunaarummi matumani pineqartunik nakkutilliissaaq.

§ 7. Naalakkersuisut kommunalborgstyrelsip pisinnaatitaaffisa suliaasaasalu nalunaarut manna naapertorlugu isumagineqarnerinik, aammalu § 8 naapertorlugu imermik misissugassamik tigusernerit ingerlanneqarnerinik nakkutilliissapput.

Imm. 2. Naalakkersuisut kommunalborgstyrelsip pisinnaatitaaffinut suliaasaanullu sukumiinerusumik piumasaqaateqarsinnaapput, taakkunungalu piumasaqaatit ukununga tunngasut ilaapput:

- 1) Angallannermut illinilianik piareersaaneq nalunaaqutsersuinerlu.
- 2) Inunnut tamanut ilitersuineq.

- 3) Upalungaarsimanermi pilersaarutit aamma mingutsitsinermik akiuiniarluni atortut.
- 4) Kommunalbestyrelsi nakkutilliinerata annertussusia ingerlanneqarneralu.

§ 8. Naalakkersuisut imermik akuiarneqanngitsumik imerneqarsinnaasumillu misissugassanik saniatigut tiguisarnissamut piumasaqaateqassapput. Imermi misissugassat tunngavissallu misissoqqissaagassat amerlassusissaat sukumiisut kommunalbestyrelsimut, Nakorsaaneqarfimmut, Kalaallit Nunaanni Nersutit Nakorsaqaarnermut Inuussutissanullu Oqartussaasut, kiisalu Nukissiorfiit siumoortumik tusarniaaffigereernerisigut aalajangersarneqassapput.

Imm. 2. Misissugassanik tiguisarneq imermut imerneqarsinnaasumut Namminersorlutik Oqartussat nalunaarutaanni misissugassanik tiguisarnermut piumasaqaatit naapertorlugit Nukissiorfinnit isumagineqassaaq.

Imm. 3. Kommunalbestyrelsip Nukissiorfiit misissugassanik tiguisarnermut aningaasartuutaat matussusissavai.

Upalungaarsimaneq mingutsitsinernillu akiuisarneq

§ 9. Kommunalbestyrelsi mingutsitsisoqartillugu isumaginninnissamut upalungaarsimanermut pilersaarusiussaaq.

Imm. 2. Upalungaarsimanermut pilersaarummi mingutsitsisoqartillugu imaluunniit mingutsitsisoqarnissaanut ulorianartorsiortoqartillugu pilertortumik pitsaasumillu suliniuteqarsinnaaneq qulakkeerneqassaaq.

§ 10. Suliat nalunaarummut matumunnga tunngassuteqartut mingutsitsinermik kinguneqarpata, tassungalu ilanngullugu uuliamik akuutissanilluunniit imerpalasunik navianaatilinnik allanik mingutsitsisoqarpat, kommunalbestyrelsi pisussaavoq erngerluni mingutsitsinerup pisup salinnissaa qulakkiissallugu.

§ 11. Mingutsitsisoqartillugu kommunalbestyrelsip piaarnerpaamik Naalakkersuisoqarfik avatangiisinut akisussaasuusoq nalunaarfigissavaa. Aamma imeqarfiup killeqarfiata iluani mingutsitsisoqarpat kommunalbestyrelsi piaarnerpaamik Nukissiorfinnut nalunaaruteqassaaq.

Pineqaatissiisarnermut aalajangersakkat

§ 12. Akiliisitsinermik pineqaatissinneqarsinnaavoq Ilulissani imeqarfiup killeqarfiani imaluunniit UNESCO-p nunarsuarmiunut kingornussatititaani killeqarfinnilu tassunga atasuni:

- 1) § 4, nr. 1 unioqqutillugu qamutininik assakaasulinnik nakkutigineqanngitsunik qimatsisoq.
- 2) § 4, nr. 2 unioqqutillugu angallannermi naasut ajoquserlugit ingerlaartoq, tassungalu ilanngullugu sakkortuumik sangulluni, sukkassarluni uneriaataarluniluunniit.
- 3) § 4, nr. 3 unioqqutillugu uuliamik tunisassianik akuutissanilluunniit allanik mingutsitsinissamut ulorianaatilinnik uninngatitsisoq.
- 4) § 4, nr. 4 unioqqutillugu igitassaminik qimatsiinnartoq.
- 5) § 4, nr. 5 unioqqutillugu akuutissanik avatangiisinut ajoqusiinnaasunik assartuussisoq.

- 6) Qamuteralannik illiniliuutinilluunniit, mingutsitsisinnaanerup sapinngisamik killilerlugit ilusiligaanngitsunik imaluunniit aserfallatsaalineqarsimanngitsunik ingerlaartoq, takuuk § 4, nr. 6.
- 7) Hydraulikuuliamik, § 4, nr. 7-imi piumasaqaatinik naammassinninngitsunik, atuisoq.
- 8) Piffissat kommunalbestyrelsip § 2, imm. 1 naapertorlugu tamatumunnga akuerisimasaasa avataanni ingerlaartoq imaluunniit piumasaqaatit erseqqinnerusut, kommunalbestyrelsip § 5, imm. 2 naapertorlugu piumasaqaatai unioqqutillugit ingerlaartoq.

Atuuttussanngortitsinermut aalajangersakkat

§ 13. Nalunaarut manna 01. Januar 2025-mi atuutilerpoq.

Namminersorlutik Oqartussat, ulloq 03.december 2024

Kalistat Lund (atsior.)

Nunalerinermut, Imminut Pilersornermut, Nukissiutinut Avatangiisinullu Naalakkersuisoq

/ Natuk Lund Meire

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut